

井研縣志卷之六

風俗志

士習 喪祭

民情 歲時俱

婚嫁 新增

撰曰董子云上之化下下之從上猶泥之在鈞惟甄者之所爲若金之在鎔惟冶者之所鑄然則土無定俗第視乎所以移易之耳研地俗稱近古力田孝弟自前代已然今幸逢

盛世漸摩涵濡翕然向化所由秀者崇尚儒雅朴者務本力穡按蒲亭之戶勉課農桑登麟鳳之峯惟聞絃誦盖純化旣敷莫之課而自厲異日輶軒問俗

井研縣志

卷之六

一

庶幾講讓型仁彬彬乎比戶可封之盛矣作風俗志

通志土瘠地僻士好詩書農勤耕女勤織

舊志云愿慤而好靜公議而無私有古淳朴風其土瘠故無萬鍾之家其地左故無千金之賈不樂遷徙士類頗好讀書農商勤於耕業出方輿勝覽及明時總志

士習

邑自四李談經鄧牟青陽餘韻士之讀書稽古者

鮮不津津焉心竊嚮往乃或中道而弛慕授受遺風爲富室所宗仰遂正顏而爲人師毋乃有感於學者先治生之言耶然竹塢松陰絃誦相聞道旁停車每動武城之想

民情

同一陶朱公子也長者之情與少者迥異况一邑之大萬民之衆歟然土費耕耨勢不得不勤財源窘窄勢不能不儉則夫惰與奢之少有非其情固然抑亦地使之然耳禮云修其教不易其俗齊其

井研縣志

卷之六

二

政不易其宜撫茲淳古之風隨時整飭化與心成自能蒸蒸日上山陰道中中牟縣裏知不必遠慕古人也

婚嫁

豐儉不一然天地之大義人之終始道無不同禮以時爲大酌乎時宜無過無廢斯之謂禮何必取千百年不行之古禮而行之以駭人觀聽耶邑之以正以時雖在編氓殆莫不然固

聖化之浹人者深抑亦里俗之仁厚者美耳

喪祭

國家制以二十七月賢者恒過之故由飯含逮小斂大斂哭泣各如其禮葬用灰椁石椁財力各稱其量盖悲哀之心出於自然而非有待於勉強百期週年三週除服必行奠祭之禮鄉鄰親友聞其將葬盒酒祭章弔且賻有親睦風至用浮屠諷經士大夫家或正之而百姓時和年豐往往徇其弊不能盡改

歲時

井研縣志

卷之六

三

天時運於上人事變於下蜀郡縣志歲時大抵相類傳於高曾不忘其祖習於士大夫不外共鄉鄉俗最重元旦黎明盥洗然香楮列肴果拜

天地拜先靈次父母兄嫂次伯叔及從伯叔兄弟後親友鄉鄰往來設酒食相慰勞謂之賀年門貼新聯夜聞篝燈之讀戶煮春酒客醉夕陽之天謂羲皇上世是耶非耶

元宵爆竹徹夜扮龍燈雜劇鼓樂喧闐厥聲載路直至廿後止火樹銀花綴鑊峯之星點汛防管鑰

弛山域之禁門此足以覘

盛世驗昇平矣

二月初三祭梓潼帝君鄉村有演戲者城內各官  
致祭紳士頒胙

二月十二爲城隍會闔邑市鎮釀金演戲至十餘  
日民氣和樂不倦商賈亦習而相忘

清明節掃墓爆竹相聞千邱紙樹士子有遠館鄰  
邑者屆期必遄歸紙灰蝴蝶血淚杜鵑追遠之思  
古今同然

井研縣志

卷之六

四

俗重蠶桑春雷後蚕務起農亦漸次播種有事於  
西疇日烘山腰桑濃牆畔崖徑蹊間樹木交蔭時  
鳥變聲碧沚沉潭溪有漁釣之叟菱紅飛綠風嘯  
漸老之春誇若耶武陵者當睹此而傾心焉

四月賣新絲送公租忙插秧把僱役夫運桔槔灌  
高燥田畝挈水飛鷗耕雲漾日耒耨之利取諸風  
雷田家之樂乃亦有秋犍犗濡乎腹尾耕夫勞在  
泥塗君子於是乎卜有年

端午苗之早青者已耘山頭地角猶望雲雨滂沱

多插晚稻角黍賀節飲酒或未遑及家所以有餘粟而戶無飢民外戶不閉夜可息擊柝之聲我倉尙盈市不糶五月之穀千佛山中同居福地何必羨蹲鴟於岷山之下乎  
單刀會故老相傳慶祝

關帝由來已久市鎮好事者或令梨園演水淹七軍故事傍江邊搭戲棚看周將軍水中擒操將龐德于禁爲歡謔

六月六日諺曰六月六晒衣服凡衣物受潮濕於

井研縣志

卷之六

五

夏交秋而虫生焉故衣服書畫恒於是月暴之二十四日川主會川主者 錫封通祐王李

公諱冰之次子顯英王也俗稱曰二郎相李公鑿離堆引江水漑田有功故蜀人處處祠之是期演戲或三五日而灌江前後凡經月餘有功德於民者也又六月六日賽社神祈穀也曰秧苗土地社中人咸在焉扮影戲燕飲醉飽亦一日之澤也

七月七日古人於此日曝衣乞巧故有鵲辭穿線榭花映曝衣樓之句邑人不尙此事盖無所傳耳

十四日祭祖宗秋祭也俗曰七月半浮屠爲盂蘭會各剎諷佛經七八日或有入剎拜佛者

昇平已久生齒日繁緇流假懺悔以射利鄉村惑於虛無而奔波於其中彼固不知佛爲何如人其教爲何如教也

中秋前半月舖戶賣月餅爲玩月供鄉村收穫畢者少休息燕飲爲樂城內客民人等咸過節有預送佳節儀物者各祠廟僧撞鐘聲較常倍清亮看松下之月影聽花宮之鐘聲旅人不無故鄉節物

井研縣志

卷之六

六

之感前署縣盛麟因未及迎養有掩金罇空對月句

重陽日登高文人韻事有攜酒肴登山行令浮白拈韻分題者極一日樂田家於是日釀酒曰重陽酒隔年宴客以爲美

冬至節鄉俗不重

臘八節鄉俗亦不重惟於是日宰牲鷄鵝鴨前署縣盛麟有分來臘八早衙餐千佛山中兩歲寒句二十四祭灶張燈燭通街輝煌爆竹聲至夜半鄉

村於二十三二十四兩日祭有衿三民四之謠赴  
壑修蛇餘尾無幾終歲勤動於焉少憇對竈君而  
祈福炳香楮以迎祥亦爆竹相聞時和歲稔稱盛  
事焉  
除夕鄉俗最重朝食後謁拜諸尊長曰辭年爲酒  
食午後祭家神祖宗家人歡聚燕飲曰年飯少者  
或不寢賽爆竹聲徹夜曰守歲子瞻詩云努力盡  
今夕少年猶可誇蜀中風俗由來舊矣